

Et Tünnche op Wallfahrt

Robert Hoß

W Weil et Tünnche su brav jewäes wor, kroch er von seinem Opa de Russekranz jelinnt on dorf met de Oma noh Bornhofen fahre. Em Bus wurte op en Finsterplatz jesatz on wor natürlich de Hahn em Korref.

Bi se joot aus Breisech eraus woren on noch ih se en Kobbelenz üwwe de Rhein op die schäl Seit fuhren, hatt der Klän en dubbelte Botteram von de Oma, en Dus Cola von de Frau Schmitz, en Frekadell von de Tant Traudche on en Banan vom Kättche vebotz.

Su konnt er die Tafel Schuggelad, die sein Mamm im en de Tösch jedaut hatt, beim beste Welle net mih vedröcke. Er wur janz stell on satz sech noh henne en de letzte Reih. Op ämol, zwösch en „Vater unser“ on „Jejrüsset seis de Maria“, reef er janz laut, domet die Oma et och hüre konnt: „Oma, Oma, ech moss es pinkele!“

Die Oma krooch en rude Kopp on jöck met dem Klän op der enjebaute Klo em Bus. Dann soet se im: „Tünnche, wenn dau noch es Pipi maache moss, dann sös de: 'Oma, ech moss op de Klo.' Pinkele söt me net!“

En Bornhofen anjekumme, jingen se en de Wallfahrtskereich, für Keerze opzestelle. Die Oma erklärt im, dat dät me, wemme en besondere Wunsch om Herze hätt. Der leeve Jott dät änem dann helfe.

Et Tünnche hät dann jet länger üwwelaach. Dann freech er: „Oma, kann ech och e paar Kerze opstelle?“ - „Bofür dann direck e paar?, wollt die Oma wesse. „Häss dau esu vill Wünsche om Herze? Et jät dir doch joot?“

„Nojo“, mänt der Klän, „mir jät et jo och joot, awwer der Foßballer von der SG net,

die stohn om letzte Platz. On janz esu joot jät et mir jo och net. Weil meine Bapp mir jetz die janze Schuggelad fott iss, seitdem der nemmi rooch. Der soll widde met dem Rooche anfangen! On dann mööch ech, dat der leeve Jott et Jüppche, mei Brödeche, jet schnelle wahße löt, domet ech in kamesöle darf, wenn der mir mein Eisebahn von de Schinne schmeiss.“

Die Kerz für die SG hät die Oma im bezahlt. Su jar en decke. Dat met denne zwä annere Kerze, mänt se, sollt er besser bleiwe loße.

Mettachs jingen se enem Lokal esse. Noh der Supp dät dat Tünnche sech noch es melde. Düsmol reef er quer üwwer de Dösch: „Oma, Oma, ech moss op de Klo! ... on kacke!“

Op der Röckfahrt wurd at widde de Russekranz jebeet. Dat wor dem Tünnche dann doch jet langweilech. Anstatt ze bedde, laach er sech dem Opa seine Russekranz öm die Fengere on leet den rondfleje.

Jerad bi der Kranz su schön am rotiere wor, stont op ämol de Pastur newwesch dem Klän. Der soch sech dat Spill en Zeitlang an on soet dann: „Tünnchen, damit spielt man nicht. Der Rosenkranz ist geweiht. Jede einzelne Perle steht für einen Heiligen!“

Et Tünnche wuerd janz veleje. Dann dät er seine Russekranz reumödech zesammeraffe on brav metbedde.

Doch kaum wor der Pastur fott, mooch er en widde ausenanne, laach en öm de Fengere, bekuck sech die Perle on soet: „Su, ihr Häleje, nau halt öch jot fass. Jetz jät et widder rond!“